



დმანისის მუნიციპალიტეტის საკრებულო განკარგულება



განკარგულება:გ-109. 109223425

თარიღი:08/12/2022

„დმანისის მუნიციპალიტეტში უმაღლესი განათლებისა და ჯანსაღი ცხოვრების წესის პოპულარიზაციის მიზნით, წარჩინებულ სტუდენტთა და წარმატებული (პრიზიორი) სპორტსმენების წახალისების ქვეპროგრამის განხორციელების წესის დამტკიცების შესახებ“ დმანისის მუნიციპალიტეტის საკრებულოს 2021 წლის 14 დეკემბრის N88 08 განკარგულებაში ცვლილების შეტანის თაობაზე

საქართველოს ორგანული კანონის „ადგილობრივი თვითმმართველობის კოდექსი“ 61-ე მუხლის მე-2 ნაწილისა და საქართველოს კანონის „ზოგადი ადმინისტრაციული კოდექსი“ 63-ე მუხლის საფუძველზე დმანისის მუნიციპალიტეტის საკრებულომ

გადაწყვიტა:

1. შევიდეს ცვლილება „დმანისის მუნიციპალიტეტში უმაღლესი განათლებისა და ჯანსაღი ცხოვრების წესის პოპულარიზაციის მიზნით, წარჩინებულ სტუდენტთა და წარმატებული (პრიზიორი) სპორტსმენების წახალისების ქვეპროგრამის განხორციელების წესის დამტკიცების შესახებ“ დმანისის მუნიციპალიტეტის საკრებულოს 2021 წლის 14 დეკემბრის N88 08 განკარგულებით დამტკიცებულ დანართი N1-ში და ჩამოყალიბდეს ახალი, თანდართული რედაქციით;
2. განკარგულება ძალაშია 2023 წლის 1 იანვრიდან;
3. განკარგულება შეიძლება გასაჩივრდეს კანონით დადგენილი წესით, გაცნობიდან ერთი თვის ვადაში ბოლნისის რაიონულ სასამართლოში (ქ. ბოლნისი, სულხან-საბას ქ. N113).

პაატა ყულიაშვილი

დმანისის მუნიციპალიტეტის საკრებულო-საკრებულოს
თავმჯდომარე

გამოყენებულია კვალიფიციური
ელექტრონული ხელმოწერა/
ელექტრონული შტამპი



დმანისის მუნიციპალიტეტში უმაღლესი განათლებისა და ჯანსაღი ცხოვრების წესის
პოპულარიზაციის მიზნით, წარჩინებულ სტუდენტთა და წარმატებული (პრიზიორი)
სპორტსმენების წახალისების ქვეპროგრამის განხორციელების წესი

მუხლი 1. ზოგადი დებულებები

1.1 ეს წესი განსაზღვრავს დმანისის მუნიციპალიტეტში რეგისტრირებული წარჩინებული სტუდენტებისთვისა და მუნიციპალიტეტის სახელით მოასპარეზე მაღალი სპორტული შედეგების მქონე სპორტსმენების წახალისების მიზნით ფულადი ჯილდოს დაწესებისა და დმანისის მუნიციპალიტეტის ადგილობრივი ბიუჯეტიდან გაცემის პირობებს.

1.2 წესის მიზანია სწავლაზე ორიენტირებული, მოტივირებული, წარჩინებული სტუდენტების (ბაკალავრი) და წარმატებული სპორტსმენების წახალისება ყოველთვიური ე.წ სტიპენდიის გაცემის გზით.

1.3 ქვეპროგრამის განმახორციელებელია დმანისის მუნიციპალიტეტის მერიის განათლების, კულტურის, სპორტისა და ახალგაზრდობის საქმეთა სამსახური.

1.4 დაფინანსება ხორციელდება დმანისის მუნიციპალიტეტის ბიუჯეტით გათვალისწინებული ქვეპროგრამის „წარჩინებული სტუდენტებისა და წარმატებული სპორტსმენების წახალისება“ (05 05 01) ფარგლებში.

მუხლი 2. ტერმინთა განმარტებები

2.1 ამ წესში გამოყენებულ ტერმინებს აქვთ შემდეგი მნიშვნელობა:

ა) სტუდენტი - უმაღლესი სასწავლებლის/ უნივერსიტეტის ბაკალავრის საგანმანათლებლო პროგრამის აქტიური სტატუსის მქონე სტუდენტი, რომელიც განცხადების შემოტანის მომენტისათვის არანაკლებ ბოლო ექვსი თვის განმავლობაში რეგისტრირებულია დმანისის მუნიციპალიტეტის ტერიტორიაზე;

ბ) წარჩინებული სტუდენტი - უმაღლესი სასწავლებლის ბაკალავრის საგანმანათლებლო პროგრამის სტუდენტი, რომელიც სწავლისას გამოირჩევა მაღალი აკადემიური მოსწრებით (A ფრიადი - შეფასების ქულა 91-100), რაც დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით. ასევე, სოციალურად დაუცველი (ოჯახს მინიჭებული აქვს 0-დან 100 001-მდე სარეიტინგო სოციალური ქულა) სტუდენტი, რომელიც სწავლობს სახელმწიფო აკრედიტებულ უმაღლეს ან აკრედიტებულ პროფესიულ სასწავლებელში და სწავლისას გამოირჩევა მაღალი აკადემიური მოსწრებით, რაც დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით ((A)ფრიადი - შეფასების 91-100 ქულა; (B) ძალიან კარგი - მაქსიმალური შეფასების 81-90 ქულა);

გ) სპორტსმენი - პირი, რომელიც მისდევს პროფესიულ ძალისმიერ სპორტს, გამოდის შეჯიბრებებში და/ან ეწევა პროფესიულ მოღვაწეობას ძალისმიერ სპორტში;

მუხლი 3. წარჩინებული სტუდენტების ყოველთვიური ფულადი წახალისების კრიტერიუმები, პირობები და გაცემის წესი:

3.1 ყოველთვიური ფულადი წახალისება შეიძლება გაიცეს სტუდენტზე, რომელიც აკმაყოფილებს შემდეგ კრიტერიუმებს:

ა) არის საქართველოს მოქალაქე;

ბ) განცხადების შემოტანის მომენტისთვის არანაკლებ ბოლო ექვსი თვის განმავლობაში რეგისტრირებულია დმანისის მუნიციპალიტეტის ტერიტორიაზე;

გ) არის აკრედიტებული უმაღლესის სასწავლებლის ბაკალავრის საგანმანათლებლო პროგრამის სტუდენტი;

დ) გამოირჩევა მაღალი აკადემიური მოსწრებით, რაც დასტურდება საგანმანათლებლო პროგრამის ფარგლებში მიღებული სემესტრული შეფასებების საშუალო არითმეტიკულით (A ფრიადი - შეფასების ქულა 91-100);

ე) აქვს სტუდენტის აქტიური სტატუსი; (ყოველთვიური ფულადი წახალისება არ გაიცემა დამამთავრებელი კურსის ბოლო სემესტრული შეფასების შემთხვევაში, რადგან კურსის დახურვის შემთხვევაში სტუდენტს აღარ გააჩნია აქტიური სტატუსი).

ვ) არის სოციალურად დაუცველი სტუდენტი (ოჯახს მინიჭებული აქვს 0-დან 100 001-მდე სარეიტინგო სოციალური ქულა), რომელიც სწავლობს სახელმწიფო აკრედიტებულ უმაღლეს ან აკრედიტებულ პროფესიულ სასწავლებელში და სწავლისას გამოირჩევა მაღალი აკადემიური მოსწრებით, რაც დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით ((A)ფრიადი – შეფასების 91-100 ქულა; (B) მაღიან კარგი – მაქსიმალური შეფასების 81-90 ქულა);

ზ) „4+1“ პროგრამით მოსარგებლე, კერძოდ ე.წ ქართული ენის მოსამზადებელი საგანმანათლებლო კურსის სტუდენტი/მსმენელი ყოველთვიურ დაფინანსებას მიიღებს უშუალოდ სასურველი ფაკულტეტის პირველი კურსის პირველი სემესტრის წარჩინებით დასრულების შემდგომ. გამოჩვენებს სოციალურად დაუცველი სტატუსის მქონე „4+1“ პროგრამით მოსარგებლე სტუდენტი, სემესტრული შეფასება (A)ფრიადი (შეფასების 91-100 ქულა).

3.2. წარჩინებული სტუდენტების ყოველთვიური ფულადი წახალისების გაცემა:

ა) წარჩინებული სტუდენტები, რომელთა მაღალი აკადემიური მოსწრება დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით (A) ფრიადი (შეფასების 91-100 ქულა) დაფინანსდებიან ყოველთვიურად 150 (ასორმოცდაათი) ლარის ოდენობით (მიმდინარე სასწავლო წლის წლის 1 მარტიდან 1 აგვისტომდე და 1 აგვისტოდან 31 დეკემბრამდე). აღნიშნული ეხება სოციალურად დაუცველ წარჩინებულ სტუდენტს, რომლის აკადემიური მოსწრება დასტურდება საგანმანათლებლო

პროგრამის ფარგლებში მიღებული შეფასებების საშუალო არითმეტიკულით (A) ფრიადი (შეფასების 91-100 ქულა).

ბ) სოციალურად დაუცველი წარჩინებული სტუდენტები, რომელთა მაღალი აკადემიური მოსწრება დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით (B) ძალიან კარგი (მაქსიმალური შეფასების 81-90 ქულა) დაფინანსდებიან ყოველთვიურად 100 (ასი) ლარის ოდენობით (მიმდინარე სასწავლო წლის წლის 1 მარტიდან 1 აგვისტომდე და 1 აგვისტოდან 31 დეკემბრამდე) .

გ) სოციალურად დაუცველი სტატუსის მქონე 4+1 პროგრამით მოსარგებლე სტუდენტი, რომელთა პირველ მოსამზადებელ კურსზე მაღალი აკადემიური მოსწრება დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით (A) ფრიადი (შეფასების 91-100 ქულა) დაფინანსდებიან ყოველთვიურად 100 (ასი) ლარის ოდენობით (მიმდინარე სასწავლო წლის 1 მარტიდან 1 აგვისტომდე და 1 აგვისტოდან 31 დეკემბრამდე).

დ) წარჩინებულ სტუდენტს ყოველთვიური ფულადი წახალისება მიეცემა წინა სემესტრული შეფასების გათვალისწინებით.

ე) ანაზღაურება მოხდება უნაღდო ანგარიშსწორების ფორმით წარჩინებული სტუდენტის პირად საბანკო ანგარიშზე.

ვ) ფულადი წახალისება გაიცემა დმანისის მუნიციპალიტეტის მერის ბრძანებით, მუნიციპალიტეტის მერიის განათლების, კულტურის, სპორტისა და ახალგაზრდულ საქმეთა სამსახურის დასკვნის საფუძველზე.

მუხლი 4. ყოველთვიური წახალისების მისაღებად წარჩინებულ სტუდენტთა მიერ წარმოსადგენი დოკუმენტაცია

ამ წესის მე-3 მუხლით გათვალისწინებული ყოველთვიური წახალისების მისაღებად ყოველი ახალი სასწავლო სემესტრის დასაწყისში სტუდენტებმა მერიაში უნდა წარადგინონ:

ა) განცხადება;

ბ) პირადობის დამადასტურებელი დოკუმენტის ასლი;

გ) დმანისის მუნიციპალიტეტში რეგისტრაციის შესახებ ამონაწერი/ სოციალურად დაუცველი სტუდენტების შემთხვევაში ცნობა ან ამონაწერი სოციალურად დაუცველთა ერთიან მონაცემთა ბაზაში რეგისტრაციის თაობაზე;

დ) ცნობა (დედანი) აკრედიტირებული უმაღლესი სასწავლებლიდან აქტიური სტუდენტის სტატუსის შესახებ, სასწავლო კურსისა და სემესტრის მითითებით;

ე) სახელმწიფო აკრედიტებული უმაღლესი სასწავლებლიდან წინა სემესტრული შეფასების შესახებ ამონაწერი/ე. წ სტუდენტის ბარათი, რითაც სტუდენტის მაღალი აკადემიური მოსწრება დასტურდება საგანმანათლებლო პროგრამის ფარგლებში მიღებული შეფასებების საშუალო არითმეტიკულით ((A)ფრიადი – შეფასების 91-100 ქულა; (B) ძალიან კარგი- შეფასების 81-90ქულა);

ვ) პირადი ანგარიშის საბანკო რეკვიზიტები.

მუხლი 5. სპორტსმენების ყოველთვიური ფულადი წახალისება

5.1 ყოველთვიური ფულადი წახალისება გაეწევათ დმანისის მუნიციპალიტეტში მცხოვრებ და მუნიციპალიტეტის სახელით მოასპარეზე სპორტსმენებს, რომლებიც გასულ წელს გახდნენ ან/და მიმდინარე წელს გახდებიან:

ა) ძალისმიერი სპორტის სხვადასხვა სახეობაში (დიდებში და ახალგაზრდებში) საქართველოს ჩემპიონები, პრიზიორები – 100 (ასი) ლარის ოდენობით;

ბ) გასულ წელს გახდნენ ან/და მიმდინარე წელს გახდებიან მსოფლიო და ევროპის ჩემპიონები სხვადასხვა ასაკობრივ ჯგუფში - 100 (ასი) ლარის ოდენობით;

5.2. სპორტსმენების ყოველთვიური ფულადი წახალისება, განცხადების წარდგენიდან ერთი წლის განმავლობაში, გაიცემა მუნიციპალიტეტის მერის ბრძანებით, მუნიციპალიტეტის მერიის განათლების, კულტურის, სპორტისა და ახალგაზრდულ საქმეთა სამსახურის მიერ ყოველთვიურად წარმოდგენილი დასკვნის საფუძველზე.

5.3 ანაზღაურება მოხდება უნაღდო ანგარიშსწორების ფორმით სპორტსმენთა პირად საბანკო ანგარიშზე ან არასრულწოვანების შემთხვევაში მშობლის მიერ წარმოდგენილ საბანკო ანგარიშზე

მუხლი. 6 ყოველთვიური ფულადი წახალისების მისაღებად წარმატებული სპორტსმენის მიერ წარმოსადგენი დოკუმენტაცია

6.1 ამ წესის მე-5 მუხლით გათვალისწინებული ფულადი წახალისების მისაღებად სპორტსმენმა დმანისის მუნიციპალიტეტის მერიაში უნდა წარმოადგინოს

ა) განცხადება;

ბ) პირადობის მოწმობის ასლი (პირადობის დამადასტურებელ დოკუმენტში რეგისტრაციის ადგილის განუსაზღვრელობის შემთხვევაში, – სსიპ – სახელმწიფო სერვისების განვითარების სააგენტოდან განცხადება – ანკეტის (ფორმა No1 ასლი);

გ) სპორტსმენის მიერ საპრიზო ადგილის დაკავების ან გამარჯვების დამადასტურებელი დოკუმენტი;

დ) არასრულწლოვნების შემთხვევაში პირადი ან მშობლის საბანკო ანგარიშის რეკვიზიტები.